



Lúxemborg, 25. mars 2021

FRÉTTATILKYNNING 03/2021

Dómur í máli E-3/20 norska ríkið gegn Anniken Jenny Lindberg

VIÐURKENNING Á FAGLEGRI MENNTUN OG HÆFI - TANNLÆKNIR

Með dómi sem kveðinn var upp í dag veitti EFTA-dómstóllinn ráðgefandi álit við spurningum sem bárust frá Hæstarétti Noregs (*Norges Høyesterett*) varðandi túlkun á tilskipun 2005/36/EB um viðurkenningu á faglegri menntun og hæfi („tilskipunin“).

Málið varðaði höfnun á umsókn Anniken Jenny Lindberg um leyfi til að starfa sem tannlæknir í Noregi (gistiríkið). Anniken Jenny Lindberg er norskur ríkisborgari með gráðuna *cand. odont.* frá Árórsarháskóla í Danmörku (heimaríkið). Hún hlaut leyfi til þess að starfa sem tannlæknir í Danmörku. Nauðsynlegt er þó að afla sér vottorðs til viðbótar að loknu 12 mánaða starfi eftir útskrift til að geta unnið sjálfstætt sem tannlæknir.

Landsdómstóllinn sóttist eftir skýringu á 1. mgr. 21. gr. tilskipunarinnar. Ákvæðið mælir fyrir um að vitnisburði um formlega menntun verði að fylgja „þar sem við á“ þau vottorð sem um getur í tilskipuninni. Taldi EFTA-dómstóllinn að orðalagið „þar sem við á“ verði að túlka í samhengi sjálfkrafa viðurkenningar á faglegri menntun og hæfi. Orðalagið verði að skilja sem tilvísun í hvers konar viðbótarvottorð sem krafist er í heimaríkinu og gerð eru grein fyrir í v. viðauka tilskipunarinnar fyrir aðgang að starfsgreininni. Þar af leiðandi verður umsækjandi að hafa undir höndum öll þau vottorð sem fylgja vitnisburði um formlega menntun sem gerð er grein fyrir og í samræmi við kröfur heimaríkisins fyrir viðkomandi starfsgrein, til þess að geta hlotið sjálfkrafa viðurkenningu samkvæmt tilskipuninni.

Landsdómstóllinn bað einnig um skýringu á því hvort að gistiríkið verði að skoða umsókn um viðurkenningu samkvæmt 28. og 31. gr. EES ef umsækjandi uppfyllir ekki skilyrði fyrir viðurkenningu samkvæmt 10. og 21. gr. tilskipunarinnar, og ef svo er, viðkomandi atriði í slíku mati. EFTA-dómstóllinn taldi að 28. og 31. gr. EES yrði að túlka sem svo að þau krefðust þess að gistiríkið framkvæmdi einstaklingsbundið mat á þekkingu og námi sem staðfest væri með faglegri menntun og hæfi umsækjandans. Matið verði að fela í sér samanburð á öllum prófskírteinum, vottorðum og öðrum vitnisburði um formlega menntun og reynslu gagnvart eigin kröfum til þess að starfa í viðkomandi starfsgrein. Ef þekking, menntun og hæfi umsækjandans, sem staðfest eru með prófskírteini, og viðkomandi starfsreynsla eru ekki samsvarandi, eða samsvara eingöngu að hluta til við kröfurnar, verður gistiríkið að taka fram hvaða nám skortir svo að umsækjandinn geti lokið eða bætt við námið til þess að greiða fyrir skilvirka nýtingu grundvallarréttindana sem tryggð eru með EES-samningnum. Sú staðreynd að umsækjandi hafi ekki fullan aðgang að starfsgreininni í heimaríkinu getur ekki verið afgerandi fyrir matið á því hvort að umsækjandanum megi veita aðgang að sömu starfsgrein í gistiríkinu.

Dóminn í heild sinni er að finna á vefslóð EFTA-dómstólsins: www.eftacourt.int.

Fréttatilkynning þessi er ekki opinbert skjal. Dómurinn sjálfur gildir.